



CYFLWYNIAD BYR

Ynni Cynaliadwy i Bawb

at Amser y Cread 2012



Llun: Paneli haul ar yr Eglwys yn Uno yn Caloundra, Queensland, Awstralia

Llun o fferm wynt: [Chrishna](#) 

ADDAS I GYLCHGRAWN NEU GYLCHLYTHYR EICH EGLWYS

Rhodd oddi wrth Dduw fel rhan o'i gread yw ynni, a rhodd na fyddwn yn sylwi fawr arni ... nes daw toriad trydan! Ond y mae un o bob pump o bobl y byd heb drydan o gwbl ac wedi'u hamddifadu o'r offer a'r dulliau cyfathrebu a llawer o'r cyfleoedd yr ydym ni'n eu cymryd yn ganiataol. Dibynna dau o bob pump ar losgi unrhyw beth o goed i dom anifeiliaid at goginio a gwresogi, ac y mae'r mwg a'r nwy o hynny yn andwyol i'r amgylchedd ac i iechyd: amcangyfrifir bod dwy filiwn o bobl yn marw bob blwyddyn o ganlyniad.

Gwnaeth y Cenhedloedd Unedig 2012 yn Flwyddyn Ynni Cynaliadwy i Bawb, gyda'r nod o ddarparu ynni glân a dibynadwy i'r holl fyd erbyn 2030. Ond nid mater yn unig i'r byd sy'n datblygu mo hwn. Rhaid i ninnau wneud newidiadau sylfaenol ac yn lle cynhyrchu trydan trwy ddulliau sy'n achosi newid yn yr hinsawdd ac o danwydd ffosiledig cynyddol ddrud troi at ddulliau mwy adnewyddadwy a cheisio bod yn fwy effeithiol a defnyddio llai. Mae'r newidiadau hyn yn ddadleuol ac y mae gennym o hyd anawsterau i'w datrys, ond y mae amser yn brin i gyrraedd y targedau y dywed gwyddonwyr eu bod yn angenrheidiol.

Gall hyn ymddangos fel rhywbeth i'w adael i'r arbenigwyr, ond fel Cristnogion y mae gennym gyfrifoldeb deublyg i ofalu am y tlodion ac i ofalu am y blaned. Rhaid inni felly fod yn ymwybodol o'r anawsterau a gwybod sut y gallwn weithredu fel unigolion ac fel eglwysi. Dyna pam mai Ynni Cynaliadwy yw thema Eglwysi Ynghyd ym Mhrydain ac Iwerddon (CTBI) at Amser y Cread 2012, a gobeithiwn y byddwch yn defnyddio'r deunyddiau mewn eglwysi a grwpiau cartref ac fel unigolion.

Digwydd Amser y Cread bob blwyddyn rhwng 1 Medi a 4 Hydref. Gellir lawrlwytho deunyddiau CTBI, yn cynnwys nodiadau at bregethau, ymbiliau, adnoddau at astudio mewn grwpiau a deunyddiau litwrgaidd oddi ar www.ctbi.org.uk/creationtime